

Fernando Hodge

Loke 40 aña Road Runners Club Korsou (RRCK) ta trese na mi memoria.

Mi nòmber ta Fernando F. Hodge, miembro di RRCK pa mas ku 30 aña. Mi ta kòrda ku ta durante di un Thriatlon ku a kuminsá i kaba na Coney Island den aña 1989 ku mi a bai yuda, riba rekomendashon di un miembro (Sra. Rudy Odalis).



Despues di e triatlon el a hasi mi miembro di RRCK i mi a keda miembro te ku dia di awe. E tempu ei Sr. Mike Snijder (q.e.p.d) tabata presidente di e Klup. Mike, manera nos tur ta yam'é, tabata un presidente hopi agradabel pa traha kuné i su tim. Mi ta kòrda ku ora mi a drenta klup mi tabata yuda ku harma i desharmá "fuik". Hasi entrega di petishon di pèrmit i tambe buska e pèrmit ora e ta kla na Politie Post. Parti flyers, kumpra eis, hiba jug pa Sra. Monte (q.e.p.d), un señora di edat, masha nèkdó, ku tabata traha saku di awa. Tambe mester a buska sòpi mainta tempran, hiba jugnan ku saku di awa pa Padvindernan na Suvek, buska T-shirt etc, espesialmente pa nos karedanan ku tabata mas popular. Tambe ta tin spònser manera Kareda di Amstel, Kareda di CITCO (dia di mama), kareda di Rònt Schottegat (dia di tata), kareda di Fatum, kareda di Refineria di Kòrsou, kareda Mitar Marathon di Post. Ami huntu ku Sr. Cerilio Maduro (q.e.p.d) tabata bai Punda, Otrobanda i supermarketnan pa parti flyers di e karedanan. RRCK su karedanan tabata masha popular i gustá, tantu den nos pueblo i pa koredónan di Aruba, Boneiru, Sint Maarten i Venezuela. De bes en kuando otro paisnan tambe tabata partisipá, pues nos tabatin turista koredó e momentonan ei na Kòrsou. Ora mi a drenta RRCK mi tabata kana/kore e kompetensianan. Pasobra promé

mi tabata un kanadó. Despues ku mi a ripará ku mi ta yega despues ku mayoria hende a drenta finish kaba, mi a disidí di kuminsá trein kore. Mi ta kòrda ku mi a kuminsá trein kore ku Sr. Archie Beliosa na koredor, algu ku tabata un eksperensia masha agradabel. I asina mi a sigui trein ku diferente otro atleta. Asina den treinmentu i tambe partisipando na karedanan di RRCK i tambe karedanan di Kaya i mondi, mi a sera amistad ku diferente koredó. Un di nan ta David de La Court ku pa kasualidat ta traha na e mesun kompania ku mi. Asina nos dos a bira trainingspartner di otro. Durante mi karedanan tambe mi a sera bon amistad ku nos ayudantenan, esta nos "angelsnan", i tambe e muchanan di padvinderij i bon relashon ku Rode Kruis i tambe brigada di Polis.

Pa mi por a bira mas vèrsá den entrenamentu mi a sigui i finalisá e kurso di Entrenadó nivel I. Ku e konosementu aki mi por a entrená nos grupo i tambe yuda RRCK ku treinen riba djaweps, ora ku e entrenadó Edwin Lopez Ramirez (q.e.p.d.) no tabata por.

Asina despues di tempu nos a forma un grupo ku ta trein huntu, pa bai karedanan pafó di Kòrsou. Nos a bai Aruba, Boneiru, New York, Hulanda, Japon i Hawai. Un kos ku semper mi ta kòrda ta ku despues di ruim op i warda tur kos

den kòntainer, ora kareda a kaba, Mike ta puntra ken ta bai snèk. Esun promé ku ta kontestá ta Cerilio Maduro (q.e.p.d.), pasombra e ta bisa semper: baha set. I asina nos tur ta bai Sylvia Snack, dal algu di bebe i kome un snèk. Akinan nos ta interkambiá i analisá e kareda kon kos a bai i tambe pone fecha pa próksimo reunion di bestür. Esaki pasombra Mike mester tene kuenta ku su skèdjul di warda. I semper tin interkambionan òf diskushonnan masha prèt i alegre.

Mi mes no tabata un di e mihó koredónan den mi kategoria òf all around. Echo ta ku den mi kategoria tabatin hopi bon koredó. Pero tòg ora algun di nan no partisipá, mi ta kai den premiashon. Remarkabel ta ku tur biaha ku mi yega na kualke kareda, ta masha mamamentu di gai tin ken mi ta kore i ken no por kore mi. Un hilaridat kompletu pero chistoso. Asina mes ta tin koredó ku tabata tuma e kos mashá na serio. Tin bia nos tabata pusta pa kaha di serbes. Manera semper tin sierto persona ku ta bula pipa pasombra nan no tin sèn òf no ke saka sèn pa kumpra kaha di serbes.

RRCK tabatin tur sorto di kareda, di kual e tempu ei esun mas gustá ta kareda di Amstel. E tabata un kareda di grasia, pero asina mes hopi koredó tabata tum'è pa pone rekòr òf pusta ku otro. Dor ku e ta terminá na Fábrica di Amstel nos por a bebe kuantu serbes i malta ku nos tabata ke. Ta tin hende ku tabata sali di lèn for di einan. Aki tambe tabata rifa hopi rekuerdo di Amstel, kaminda hopi partisipante ta gana algu. E kareda ku ami i hopi mas koredó a denominá komo e kareda di "mata bo mama", tabata e kareda ku Sr. Jo Duvigneau (marinier) a traha den Christoffel Park komo último kareda di kampionato di RRCK. Kasi tur koredó a puntra ku ta loko Jo a bira i si e ta kere ku ta mariniernan pa bai guera e tabata trein. Pero despues di a sufri den e kareda nos por a bai disfrutá di nos fiesta den Marine Kazerne na Suffisant. Esaki a fria tur e dolónan.

Durante di añanan mi tabata den diferente direktiva di RRCK ku diferente presidente. Por ehèmpel Mike Snijder, Ronald Lieuw-Sjong, Stanley Marks i Erwin Calmes. Mi a traha komo ayudante, komisario i último komo sekretario. Siendo den RRCK mi a logra entusiasamá hopi hende pa bira miembro. Un kos ku mi ta haña hopi lástima ta ku RRCK i Kòrsou no a logra pa pone Kòrsou tambe e tempu ei riba mapa di e paisnan di Turismo di Marathon. Pasombra e tempu ei nos gobernantenan no tabata kere den Turismo di Deporte. Un ehèmpel verídiko ta ku dia RRCK a traha un ruta pa Marathon ku ta pasa riba brùg Juliana, i ami a bai entregá e petishon pa pèrmit na Politie Post, ta bisa mi ku nos no por haña pèrmit pa pasa riba brùg. Shon Polis a argumentá ku e ta peligroso i ku e koredónan por bula for di brùg. Un argumento ku ami i e hefe di polis di tráfiko a diskutí mashá, pero sin resultado. Ta di aploudí ku awe tur aktividat por pasa riba brùg Juliana. Mi ta suponé ku nan lo a sigui evaluá mi argumentonan i disidí ku mester por.

Mi ta kòrda kon Refineria di Kòrsou, den persona di Sr. Parisius, a regalá RRCK un "Start Pistol" pa RRCK usa durante su karedanan pa start kareda. Pero pa nos sorpresa "Polis" a tuma nos "Start Pistol" den beslag ora nan di ku nos mester a pidi pèrmit pa e "Start Pistol". Argumentando ku e "Start Pistol" por wòrdu usá komo un arma di kandela. Te ku fecha di awe RRCK a keda pèrdí di su "Start Pistol" ku aparentemente lo ta na Politie Post Rio Canario ainda.

Otro kos agradabel ku a pasa den bestür ta, ku RRCK a disidí di bestèl e sistema di "barcode". Pasombra den e sistema kaminda bo tin ku disidí di pone "Male" or "Female" tambe ta tin ku bo por a pone "Both" pa kada kategoria di edat. Awèl e "Both" a bira un mamamentu di gai masha prèt den bestür. Pasombra lo mester bai wak kiko tur hende a marka riba nan "Inschrijfformulier" pa nos no saka kos robes i tambe pa wak si mester pone un kategoria èkstra di "Both".

Algu chistoso di Sr. Cerilio Maduro tabata ku ora ami kuné ta kana parti flyers, semper e ta bisa mi: "Kòrda bon, ta huntu ku e "Maduro" ku tin plaka bo ta kana kuné," i ami ta bisé, bo ta kana ku Mister Hodge, i asina nos dos ta kana mama otro su gai , sigui parti nos flyernan.

Ta importante pa mi hasi menshon di nos "Angelsnan" ku Mimi na kabes. Nan tabata t'ei for di mainta tempran, asta tin bia promé ku bestür pa check-in e koredónan na start di kareda i tambe na finish pa kita "tag" for di e koredónan, ora kada unu dreña. E kitamentu di "tag" e tempu ei tabata masha vital, pasombra segun e partisipantenan ta dreña, ta pega e "tagnan" segun e sekuensia riba e planki, pa asina por a saka di kada kategoria e promé tres ganadónan.

Tabata durante di un kareda di Rònt Schottegat ora ami tabata den Roodeweg na altura di 15 km, ku Sr. Judy Westerhout a aserka mi i mi a bisé: " E Venezolano (Viasa manera ami tabata yam'é) ta bo dilanti, bai busk'é pasombra ta den bo kategoria e ta" . Awèl Judy no a pèrdè pa gana i a hisa spit bai laga mi, pa bai buska e Venezolano. Ora mi a yega finish i mi a puntra Judy kon a bai, Judy a kontestá mi: "Mi a pas'é den Breedestraat Otrobanda bai lag'e." Ami di kuné "hopi bon". Tabata nos tur dos su sorpresa, ora di entrega di premio, e Venezolano tabata den un kategoria mas yòn ku Judy. Awèl Judy a yega serka mi bisando " bo a hera di pone mi muri pa gana e Venezolano, pero e hòmber no ta ni den mi kategoria" . Mi di kuné: "pero b'a drecha bo tempu". For di e dia ei, ta kasi tur ora ku nos kaba di kore i ku nos ta na snèk, e anékdota ei ta bin dilanti. Anto Judy ta bisa mi ku nunca mas e no ta bai mi tras ora mi bisé un kos den kareda. Tambe un djasabra atardi, den Stadion di Rif, durante preparashon pa e kareda di Rònt Schottegat, Jan Steenbergen ku mi persona tabata armando e fuik. Pa di tantísimo bia mi tabata bisa Jan kue esaki pa mi, kue esaya pa mi. Te ora den un bos haltu Jan di ku mi: " Hodge, geef mij geen opdrachten, op het werk krijg ik er genoeg!" A

dura un ratu durante kua ami ku Jan a deliberá riba e motibu di nos dos su frustrashon, pa despues nos dos a sigui amenamentu ku e armamentu.

Asina tin diferente di e anékdotanan aki ku tabata hasi e karedanan di RRCK masha agradabel.

Dor di esaki tambe, ami i otronan tabata duna hopi di nos koredónan, nòmbernan di kariño ku a keda te awe. Por ehèmpel: Keshi of Ouwe Kaas (Rudy Rosaria), Ay Ya Yay (Rudy Martina q.e.p.d.), Big Boss (Walter Muzo q.e.p.d.), Oranje Broek (Johannes Baselmans), Camacho (Elphrim Knoppel), Sleutel (Henry Cruden), Mamita (Patrick Thode), Arturo Barios (Amadeo Kemper), Kid (Harold Westerhof), Haas (Ronald Lieuw-Sjong), Big Mac (Glenn MacDonald) etc.

Lo ke mi ta lamentá te ku dia di awe, ta lo siguiente:

Un proposishon ku mi a trese dilanti durante un reunion general pa kambia e nòmber di "Road Runners Club Kòrsou (RRCK)", pa " Road Runners Club Curaçao (RRCC)" òf "Curaçao Road Runners Club (CRRC)", no a keda honrá. Mi argumento ta i lo keda ku nos pais su nòmber ofisial ta " Curaçao" i no "Kòrsou". Ta nos ku ta biba riba e baranka aki, ta yam'é Kòrsou.

Mi deseo ta ku un dia den futuro, un bestür por proponé pa kambia e nòmber i duna realse na nos pais ku su bunita nòmber Curaçao.